

Date – 17/05/2024

Time - 7:30 -7:40Hrs

REGIONAL NEWS BULLETIN

HEADLINES (MORNING)

- 1. ZORO chuan India leh Myanmar ramri hung leh zalen taka ramri-a inkalpawhna hlih tumna chu a tawp thleng an dodal dawn an ti.**
- 2. Kumin chhunga Mizoram a TB um bo a nih theih nan hmalakna kalzelah Aizawl District Jail-ah Health Camp buatsaih mek a ni.**
- 3. Sawrkar laipui chuan damdawi hman tlanglawn 41 leh lung leh thin enkawlina damdawi 6 man a ti hniam.**
- 4. New and Renewable Energy Secretary Bhupinder Singh Bhalla chuan khawvela hydrogen economy hmunpui ni turin India chuan theihtawp a chhuah a ti.**

<><><>

ZORO PEACEFUL RALLY

India Sorkarin Indo-Burma border hung a tum leh Free Movement Regime (FMR) hlih a tum duhloh lantir nan nimin khan ZORO General Headquarters bultumin Zokhawthar, Vaphai khua leh Tengnopal District Manipurah kawngzawh a ni.

Vaphai khuaah hian VC kaihraina in zing dar 7:00-ah hun hman a ni a, ZORO General Headquarters Vice President Pu Rohmingthanga Kawlni leh YMA aiawh, VC aiawh leh MUP aiawh ten thu an sawi a ni. Vaphai khuaa hun hmannaah hian Vaphai leh khaw thenawm atangin mipui thahnem tak an pungkawm a ni.

Nimin vek khan Manipur Tengnopal District-ah ZORO General Headquarters buatsaihin hman a ni a, Manipur a hmanna hi Kuki Inpi leh Kuki Students' Organisation in an buaipui a ni. Tengnopal District-ah ramri hung duhlo tu leh Free Movement Regime thiah duhlo mipui thahnem tak an pungkawm a. Duhlohna thu te tarin, kawng an zawh a ni.

Nimin vek khan Lunglei ZORO Division Headquarters-ah pawh hun hman a ni bawk e.

Zokhawthar Burma Border-ah hman a ni bawk a, he hun hi Pu Michael Lalramsanga, ZORO Thalai President-in a kaihruai a ni. Zokhawthar leh a chhehvel khua mipui thahnem tak an pungkawm a, Burma lam Khawmawi khua leh a chhehvel mipui thahnem takin an rawn tawiawm bawk a ni.

He huna thusawitu ZORO President Pu R. Sangkawia chuan, ZORO in a buatsaih Border fencing leh Free Movement Regime (FMR) hlih duh loh lantirna a buatsaih chu pawl mal hmalakna mai a ni lova, hnam Issue tak tak a ni a, Zofa zawng zawng hmalakna a ni a ti a. UN Declaration on the rights of Indigenous Peoples 2007 Article ah chuan, 'Tualto hnamte a bik takin khawvel sorkar ramri khamin a thendarh te chu an inkawlpawhin an intanpui anga, Sakhaw thil leh khawtlang thil, ei leh bar leh politics-ah te anmahni mi leh sa te nen inpawh a, sawiho theihna dikna chanvo an nei a ni a ti a. Ram roreltute chuan tualto hnam te nena inbe rawnin he dikna chanvo te hi tipuitling tuirn hma an la ang,' a ti. He dan pass a nih lai hian India chuan a duhlo lama vote a pe a, tunah erawh a kalh zawngin hmalak a tum chu an hrethiam thei lova. Border fencing a tum leh FMR hlih a tum hi an dodal zel dawn a ni. a ti.

He huna thusawitu dang ZORO Gen.hqrs.Vice President Pu Lalmuanpuia Punte MLA chuan Tiau lui leh chhaka awm unaute hi daidan theih an ni lova, British sawrkarin a phuahchawp ram ri tingheta, pawmpui tura British duhlotu India Sawrkarin hma a la chu an duh lo a ni, a ti a. India sawrkar hmalakna Mizorama pawl zawng zawngin an duh lova, Mizoram Assembly House ah pawh an duh lohna pass a, hemi lantir nan hian political party hrang hrang aiawhte pawh he hunah hian an tel a ni a ti.

ZORO General Secretary Pu L. Ramdinliana Renthlei chuan, Zofate thendarhkan nih tirh a an rilru a cham reng chu insuihkhawm leha, rorelna pakhat hnuai awm a ni a, chu an beisei an nghah mek laiin India Sorkar chuan ramri hung a tum a, zalen taka kan inkalpawhna FMR hlih a tum bawk a, hei hi a tawp thleng an dodal dawn a ni a ti.

Zokhawthar peaceful rally-ah hian Bialtu MLA Pu Clement Lalmingthanga, Pu Lalmuanpuia Punte MLA, Sub-Headquarters YMA Champhai, Zokhawthar khawtlang hruaitu aiawh, Hualngo Peoples Organisation aiawh leh Political Party hrang hrang aiawh ten thu an sawi bawk a. Thusawitu hrang hrang hian hnam inpumkhatna thute, Border fencing leh FRM hlih an duh loh thute leh an dodal zel tur thute an sawi hlawm a ni.

<><><>

CM

Chief Minister Pu Lalduhoma chuan nimin khan a pisaah State Bank of India Managing Director, Chief General Manager Pu Vincent leh a thawhpuite a kawm a. Mizorama State Bank of India te hmalakna chungchang leh Hand Holding Policy kalpuina kawnga thawh dun theihna tur te a sawipui.

Chief Minister hian, SBI Credit Deposit Ratio India ram huapa chawhrual 76 a nih reng theih laia Mizoram bik 46 emaw vel chauh a ni thin chu a ngaimawh hle tih a hrilh a. Hei hi mipuite sum deposit tlingkhawm te state tan hman tangkai a ni tawh lo tihna a ni. CD Ratio sang zawk neihpui ngei turin a beisei flat a ni, a ti.

Chief Minister chuan SBI Sponsor bank, Mizoram Rural Bank a thawktu indaih lo leh Allowances tlem bik an dawng nia sawi te lo enchiang turin Chief General Manager hi a chah bawk.

Bank kaltlanga Central Scheme kalpui hrang hrang chungchang pawh a sawipui a. Heng Central Scheme awm mek te leh Mizoram sawrkar Hand

Holding Policy te chu kal kawptir tura hmalak mek a nih thu te, chumi atana Bank leh Mizoram sawrkar thawh dun dan turte an rel a ni.

Chief Minister chuan, tun hmain Central Scheme loan te chu a dawngtuten hlawhtlin tum vang pawh ni lovin subsidy emaw margin money emaw an duh vang maiin an dil fo thin a. An sawrkarah erawh chutiang mite tan chuan beisei a remchang tawh dawn lo a ti a. Hand Holding Policy nen kaikawpin; kan khaichhuah turte pawh Beneficiary ti tawh lovin Partner - thawhpui an ti tawh dawn a. A hlawhtling tur te chauh thawhpui an tum dawn a ni, a ti.

Chief Minister hi Pi R. Lalrodinga, OSD to CM, Pu Jonathan Lalremruata, OSD to CM, Pu LP Lalchangkima, Chairman & MD, ZIDCO ten an tawiam a ni.

<><><>

DIST JAIL HEALTH CAMP

Central leh Sorkar hmalaknaa kumin chhunga Mizoram a TB um bo a nih theih nan Central TB Division leh development partner hrang hrang ten hmala chhunzawmin nimin khan Aizawl District Jail-ah Health Camp an buatsaih a, District Jail – a thawktu leh awm mek mi 76 – te en dik niin vawiin hian chhunzawm leh a ni ang.

He Project in a tum ber chu Mizorama TB vei la hriat chhuah lohte a tam thei ang ber hriat chhuah a, damdawi leh enkawl na tha pek a ni a. Khawl thar leh thiamna hmanga khaw hrang hranga Health Camp nei tura hmalak chhoh tan a ni.

Mizoramah TB vei hi kum tin mi 2,000 chuang hmuh chhuah ziah anga chhut a ni a. Nikum chhung khan Mizoram chhungah mi 108 TB vangin an thi a, kumin January leh March thla inkar chhung khan TB vei mi 595 hmuh chhuah an ni tawh bawk.

<><><>

SERCHHIP

Serchhipa Inter Dist Women football nimina khelh zawh takah Aizawl Dist an champion

Senior women football nimina Serchhip Sport complex a final khelha Aizawl Dist hian an khingpui Saitual Dist chu si 2 faia hnehin an champion a. Kharna inkhawm, Serchhip Dist Sport Association President kaihhruaiah khuallian Pu John Tanpuia Secy..Mizoram Sport Council in lawmman trophy a sem.

He inkhelhah hian Mizoram Dist hrang hrang aiawh team an tel kim a. Cindy Remruatkimi Aizawl Dist player Jersey no 10 chu Best player niin, goal 9 thuntu Aizawl team a mi bawk Lalrinmuani jersey no 20 chu top scorer a ni a. Aizawl Dist team a bawk Jeesey no 14 C.Zairemmawii chu player of the match a ni bawk.

<><><>

NATIONAL DENGUE DAY

Rampum huap Dengue Do na ni- National Dengue Day chu Health & Family Welfare hnuai National Vector Borne Disease Control Programme (NVBDCP) chuan nimin khan an hmang a.

MINECO Khatlaa ATI Auditoriumah NVBDCP, Mizoram huaihawtin Aizawl Municipal Corporation huam chhung veng 166 atanga Local Council member te nen Dengue natna chungchang inzirtirna leh Dengue pung zel tur ven nana khawtlang mipui nena thawhho dan tur chungchang an zir ho a ni.

Health Services Director Dr. Lalremmawii chuan Local Council member te chu Dengue dona kawnga mipui zirtirtu, ngenna leh hriattirna pe theitu an nih angin an zirlai zirte khawtlang tana hmang tangkai theuh turin a chah a ni.

World Dengue Day ni hi Mizorama District hrang hrang pawh hman niin, TV, Chanchinbu lamah te mipui zirtirna tih chhuah a nih bakah School, Kohhran, Khawtlang leh pawl hrang hrang te nen hlawk taka hun hman ho a ni bawk.

Kum 2024 National Dengue Day thupui chu, “DENGUE TIREM TUR A KHAWTLANG NEN A THAWHHO” tih a ni.

Champhai ah pawh National Dengue Day pual hian Govt. Ruantlang High School – ah National Centre for Vector Borne Diseases Control (NCVBDC) buatsaihin hun hman a ni a.

Senior Chief Medical Officer Dr. PC Lalhminglana chuan National Dengue Day hman a nih chhan sawifiahin, Champhai District chu Dengue natna buaipui ngaihna district a la nih vat a rin thu leh tun dinhmunah a vei finfiah an la tam loh thu sawiin dengue dolet tura fimkhur taka hmalak leh inhrilhhriatna neih a pawimawh thu a sawi.

Hemi hnu hian khawlaiah Dengue chungchang inzirtirna poster-te tar niin Local Cable TV lamah Dengue chungchang zirtirna thuziak leh video-te chhuah a ni. Hei bakah hian Undivided Champhai District huamechhunga khaw hrang hranga PHC ah te Awareness Campaign leh Thosi pian theihna tui tling tih bo hnatlangte neiin hun hman a ni.

<><><>

PHARMA

Sawrkar laipui chuan damdawi hman tlanglawn 41 leh lung leh thin enkawlina damdawi 6 man a ti hniam. Nimina National Pharmaceutical Pricing Authority NPPA chuan mipuite tana man tlawm leh awlsama lei theih turin thutlukna a siam a. Damdawi siamtu company te chu damdawi zuarte hnenah damdawi man tlawm hian pe nghal vek tura hriattir an ni bawk.

<><><>

RENEWABLE ENERGY

New and Renewable Energy Secretary Bhupinder Singh Bhalla chuan khawvela hydrogen economy hmunpui ni turin India chuan theihtawp a chhuah a ti. Nimina World Hydrogen Summit 2024, Rotterdam, Netherland-a neihah he thu hi sawiin Pu Bhalla chuan palai kalkhawmte chu green hydrogen mamawh ang siam chhuak turin India chuan theihna a nei tih sawiin a hralhna lamah pawh mamawhna a sang hle a ni a ti a.

India chu renewable energy man tlawm siamchhuah naah a hmahruaitu a nih thu sawiin man tlawm taka lei theihin a siam a ni a ti a. Kum 2030 ah chuan tuna energy thianglim siamchhuahna hmun hi zaa 50 laia tihpun a tum tih sawiin energy thianglim hman uar anih theih nan theihtawp chhuah an i a ti bawk.

<><><>

UKRAINE PRESIDENT

Ukraine President Volodymyr Zelensky chuan nimir khan Kharkiv a tlawh. Pu Zelelnsky chuan an indona chu hun harsa tak ni mahse an thunun tawh a ti a. An sipai commander leh hotulu te nen an inkawmnaah President chuan an unit te tihchak zel an tum tih a sawi a. Indona hmuna an dinhmun a that loh avangin President Zelensky chuan rampawna an zin tur zawng zawng a thulh a ni.

<><><>